

御定全唐詩錄

土岐文庫  
文庫17  
W65  
10



唐詩集卷之三  
杜甫

上海圖書館藏  
民國二十一年四月一日

010185189266

文庫 17  
W 65  
10



御定全唐詩錄卷第二十七

禮部侍郎臣徐倬翰林院侍讀學士臣徐元正奉

旨校刊

杜甫四

古體詩四

元都壇歌寄元逸人

故人昔隱東蒙峯已佩含景蒼精龍故人今居子午谷  
獨在陰崖結茅屋屋前太古元都壇青石漠漠常風寒  
子規夜啼山竹裂王母晝下雲旗翻知君此計成長往  
芝草琅玕日應長鐵鎖高垂不可攀致身福地何蕭爽

十洲記鍾山在北海地隔弱水之北自生玉芝及神草  
方丈洲仙家數十萬耕田種芝草課計頃畝如種稻狀

全唐詩錄卷第二十七 杜甫

昭和六年二月一日  
土岐善麿氏寄贈

今夕行

今夕何夕歲云徂更長燭明不可孤咸陽客舍一事無  
相與博塞為歡娛馮陵大叫呼五白袒跣不肖成臯盧  
英雄有時亦如此邂逅豈即非良圖君莫笑劉毅從來  
布衣願家無儋石輸百萬

貧交行

翻手作雲覆手雨紛紛輕薄何須數君不見管鮑貧時  
交此道今人棄如土

兵車行

車麟馬蕭蕭行人弓箭各在腰耶孃妻子走相送塵  
埃不見咸陽橋牽衣頓足攔道哭哭聲直上千雲霄道

傷過者問行人行人但云點行頻或從十五北防河便  
至四十西營田去時里正與裏頭歸來頭白還戍邊邊  
亭流血成海水武皇開邊意未已君不聞漢家山東二  
百州千村萬落生荆杞縱有健婦把鋤犁禾生隴畝無  
東西况復秦兵耐苦戰被驅不異犬與雞長者雖有問  
役夫敢申恨且如今年冬未休關西卒縣官急索租租  
稅從何出信知生男惡反是生女好生女猶得嫁比鄰  
生男埋沒隨百草君不見青海頭古來白骨無人收新  
鬼煩冤舊鬼哭天陰雨濕聲啾啾

箋曰天寶十載鮮于仲通討南詔蠻士卒死者六萬楊國忠掩其敗狀反以捷聞制大募兩京及河南北兵以擊南詔人聞雲南瘴癘士卒未戰而死者十八九莫肯應募國忠遣御史分道捕人連枷送軍所於是行者愁怨父母妻子送之所在哭聲震野此詩序南征之苦設為役夫問答之詞君不聞已下言征戍之苦海內騷不獨南征一役為然故曰役夫敢申恨也且如以下言土

著之民亦不堪賦役不獨征人也君不見以下舉青海之故以明征南之必不返也  
不言南詔而言山東言關西言隴右其詞哀怨而不迫如此曰君不聞君不見  
有詩人呼祈父之意焉是時國忠方貴盛未敢斥言之雜舉  
河隴之事錯牙其詞若不為南詔而發者此作者之深意也

### 高都護驄馬行

安西都護胡青驄聲價歛然來向東此馬臨陣久無敵  
與人一心成大功功成惠養隨所致飄飄遠自流沙至  
雄姿未受伏櫪恩猛氣猶思戰場利腕促蹄高如踣鐵  
交河幾蹴曾冰裂五花散作雲滿身萬里方看汗流血  
長安壯兒不敢騎走過掣電傾城知青絲絡頭為君老  
何由却出橫門道

### 天育驃騎歌

吾聞天子之馬走千里今之畫圖無乃是是何意態雄

且傑驂尾蕭梢朔風起毛為綠縹兩耳黃眼有紫焰雙  
瞳方矯矯龍性合變化卓立天骨森開張伊昔太僕張  
景順監牧攻駒閱清峻遂令大奴字天育別養驥子憐  
神俊當時四十萬匹馬張公歎其材盡下故獨寫真傳  
世人見之座右久更新年多物化空形影嗚呼健步無  
由騁如今豈無騷裏與驂騮時無王良伯樂死即休  
張彦遠古名畫記明皇好大馬御廄至四十萬遂有沛艾大馬命王毛仲為監牧使西域大宛  
時有來獻詔於此地置羣牧筋骨行步久而方全調習之能逸異並至骨力追風毛  
彩照地不可名狀號木槽馬聖人舒  
身安神如據床榻是知異於古馬也

### 白絲行

縹絲須長不須白越羅蜀錦金粟尺象床玉手亂殷紅  
萬草千花動凝碧已悲素質隨時染裂下鳴機色相射

美人細意熨帖平裁縫滅盡針線跡春天衣着為君舞  
蛺蝶飛來黃鸝語落絮遊絲亦有情隨風照日宜輕舉  
香汗輕塵汚顏色開新合故置何許君不見才士汲引  
難恐懼棄捐忍羈旅

秋雨歎

雨中百草秋爛死階下決明顏色鮮著葉滿枝翠羽蓋  
開花無數黃金錢涼風蕭蕭吹汝急恐汝後時難獨立  
堂上書生空白頭臨風三嗅馨香泣  
關風伏雨秋紛紛四海八荒同一雲去馬來牛不復辨  
濁涇清渭何當分禾頭生耳黍穗黑農夫田婦無消息  
城中斗米換衾裯相許寧論兩相直

長安布衣誰比數反鎖衡門守環堵老夫不出長蓬蒿  
稚子無憂走風雨雨聲颼颼催早寒胡雁翅濕高飛難  
秋來未曾見白日塗汚后土何時乾

歎庭前甘菊花

庭前甘菊移時晚青蕊重陽不堪摘明日蕭條醉盡醒  
殘花爛熳開何益籬邊野外多衆芳采擷細瑣升中堂  
念茲空長大枝葉結根失所纏風霜

醉時歌

贈廣文館  
博士鄭虔

諸公衮衮登臺省廣文先生官獨冷甲第紛紛厭梁肉  
廣文先生飯不足先生有道出羲皇先生有才過屈宋  
德尊一代常坎軻名垂萬古知何用杜陵野客人更嗤

被褐短窄鬢如絲日糴太倉五升米時赴鄭老同襟期  
得錢即相覓沽酒不復疑忘形到爾汝痛飲真吾師清  
夜沈沈動春酌燈前細雨簷花落但覺高歌有鬼神焉  
知餓死填溝壑相如逸才親滌器子雲識字終投閣先  
生早賦歸去來石田茅屋荒蒼苔儒術於我何有哉孔  
丘盜跖俱塵埃不須聞此意慘愴生前相遇且銜盃

醉歌行

別從姪勤  
落第歸

陸機二十作文賦汝更小年能綴文總角草書又神速  
世上兒子徒紛紛驪駒作駒已汗血鷲鳥舉翮連青雲  
詞源倒流三峽水筆陣獨掃千人軍只今年纔十六七  
射策君門期第一舊穿楊葉真自知暫蹶霜蹄未為失

偶然擢秀非難取會是排風有毛質汝身已見唾成珠

汝伯何由髮如漆春光淡沲

草堂本作潭  
沲沲徒可切

秦東亭渚蒲芽白

水荇青風吹客衣日杲杲樹攪離思花冥冥酒盡沙頭  
雙玉瓶眾賓皆醉我獨醒乃知貧賤別更苦吞聲躑躅  
涕淚零

送孔巢父謝病歸遊江東兼呈李白

巢父掉頭不肯住東將入海隨煙霧詩卷長留天地間  
釣竿欲拂珊瑚樹潏山大澤龍蛇遠春寒野陰風景暮  
蓬萊織女迴雲車指點虛無是征路自是君身有仙骨  
世人那得知其故惜君只欲苦死留富貴何如草頭露  
蔡侯靜者意有餘清夜置酒臨前除罷琴惆悵月照席

幾歲寄我空中書南尋禹穴見李白道甫問信今何如

飲中八仙歌

知章騎馬似乘船眼花落井水底眠汝陽三斗始朝天  
道逢麴車口流涎恨不移封向酒泉左相日興費萬錢  
飲如長鯨吸百川銜盃樂聖稱避賢宗之蕭灑美少年  
舉觴白眼望青天皎如玉樹臨風前蘇晉長齋繡佛前  
醉中往往愛逃禪李白一斗詩百篇長安市上酒家眠  
天子呼來不上船自稱臣是酒中仙張旭三盃草聖傳  
脫帽露頂王公前揮毫落紙如雲煙焦遂五斗方卓然  
高談雄辯驚四筵

曲江

自斷此生休問天杜曲幸有桑麻田故將移住南山邊  
短衣匹馬隨李廣看射猛虎終殘年

麗人行

三月三日天氣新長安水邊多麗人態濃意遠淑且真  
肌理細膩骨肉勻繡羅衣裳照暮春感金孔雀銀麒麟  
頭上何所有翠微盞葉垂鬢脣背後何所見珠壓腰襖  
穩稱身就中雲幕椒房親賜名大國號與秦紫駝之峯  
出翠釜水精之盤行素鱗犀筋厭飫久未下鑿刀縷切  
空紛綸黃門飛鞚不動塵御厨絡繹送八珍簫鼓哀吟  
感鬼神賓從雜還實要津後來鞍馬何逡巡當軒下馬  
入錦茵楊花雪落覆白蘋青鳥飛去銜紅巾炙手可熱



勢絕倫慎莫近前丞相嗔

樂遊園歌

晦日賀蘭楊長史筵醉中作

樂遊古園萃森爽煙絲碧草萋萋長公子華筵勢最高  
秦川對酒平如掌長生木瓢示真率更調鞍馬狂歡賞  
青春波浪芙蓉園白日雷霆夾城仗閭闔晴開映蕩蕩  
曲江翠幕排銀榜拂水低徊舞裏翻緣雲清切歌聲上  
却憶年年人醉時只今未醉已先悲數莖白髮那拋得  
百罰深盃亦不辭聖朝亦知賤士醜一物自荷皇天慈  
此身飲罷無歸處獨立蒼茫自詠詩

漢陂行

岑參兄弟皆好奇攜我遠來遊漢陂天地黥慘忽異色

波濤萬頃堆琉璃琉璃漫汗泛舟入事殊興極憂思集  
鼉作鯨吞不復知惡風白浪何嗟及主人錦帆相為開  
舟子喜甚無氛埃鳧鷖散亂棹謳發絲管啁啾空翠來  
沈竿續蔓溪莫測菱葉荷花靜如拭宛在中流渤澥清  
下歸無極終南黑半陂已南純浸山動影裏宛冲融間  
船舷暝戛雲際寺水面月出藍田關此時驪龍亦吐珠  
馮夷擊鼓羣龍趨湘妃漢女出歌舞金支翠旗光有無  
咫尺但愁雷雨至蒼茫不曉神靈意少壯幾時奈老何  
向來哀樂何其多

沙苑行

君不見左輔白沙如白水繚以周牆百餘里龍媒昔是

渥洼生汗血今稱獻於此苑中駉牝三千匹豐草青青  
寒不死食之豪健西域無每歲攻駒冠邊鄙王有虎臣  
司苑門入門天廐皆雲屯驪驪一骨獨當御春秋二時  
歸至尊至尊內外馬盈億伏櫪在垆空大存逸羣絕足  
信殊傑個儻權奇難具論纍纍追阜藏奔突往往坡陁  
縱超越角壯翻同麋鹿遊浮深鯁蕩鼉鼉窟泉出巨魚  
長比人丹砂作尾黃金鱗豈知異物同精氣雖未成龍  
亦有神

驄馬行

太常梁卿勅賜馬也李鄧  
公愛而有之命甫製詩

鄧公馬癖人共知初得花驄大宛種夙昔傳聞思一見  
牽來左右神皆竦雄姿逸態何嶮崿顧影驕嘶自矜寵

隅目青熒夾鏡懸肉駿礪連錢動朝來少試華軒下  
未覺千金滿高價赤汗微生白雪毛銀鞍却覆香羅帕  
卿家舊賜公取之天廐真龍此其亞晝洗須騰涇渭深  
晨趨可刷幽并夜吾聞良驥老始成此馬數年人更驚  
豈有四蹄疾於鳥不與八駿俱先鳴時俗造次那得致  
雲霧晦冥方降精近聞下詔喧都邑官使騏驎地上行  
奉先劉少府新畫山水障歌

堂上不合生楓樹怪底江山起煙霧聞君掃却赤縣圖  
乘興遣畫滄洲趣畫師亦無數好手不可遇對此融心  
神知君重毫素豈但初岳與鄭虔筆迹遠過楊契丹得  
非元圃裂無乃瀟湘翻悄然坐我天姥下耳邊已似聞

清猿反思前夜風雨急乃是蒲城鬼神入元氣淋漓障  
猶濕真宰上訴天應泣野亭春還雜花遠漁翁暝踏孤  
舟立滄浪水深青溟闊欵岸側島秋毫末不見湘妃鼓  
瑟時至今斑竹臨江活劉侯天機精愛畫入骨髓自有  
兩兒郎揮灑亦莫比大兒聰明到能添老樹巔崖裏小  
兒心孔開貌得山僧及童子若耶溪雲門寺吾獨胡為  
在泥滓青鞵布襪從此始

悲陳陶

孟冬十郡良家子血作陳陶澤中水野曠天清無戰聲  
四萬義軍同日死羣胡歸來血洗箭仍唱胡歌飲都市  
都人迴面向北啼日夜更望官軍至

悲青坂

我軍青坂在東門天寒飲馬太白窟黃頭奚兒日向西  
數騎彎弓敢馳突山雪河水野蕭颯青是烽煙白人骨  
焉得附書與我軍忍待明年莫倉卒

哀江頭

少陵野老吞聲哭春日潛行曲江曲江頭宮殿鎖千門  
細柳新蒲為誰綠憶昔霓旌下南苑苑中萬物生顏色  
昭陽殿裏第一人同輦隨君侍君側輦前才人帶弓箭  
白馬嚼齧黃金勒翻身向天仰射雲一箭正隊雙飛翼  
明眸皓齒今何在血污遊魂歸不得清渭東流劔閣深  
去住彼此無消息人生有情淚沾臆江水江花豈終極

全唐言金卷第三  
九  
黃昏鐵騎塵滿城欲往城南忘南北

哀王孫

長安城頭頭白烏夜飛延秋門上呼又向人家啄大屋  
屋底達官走避胡金鞭斷折九馬死骨肉不待同馳驅  
腰下寶玦青珊瑚可憐王孫泣路隅問之不肯道姓名  
但道困苦乞為奴已經百日竄荆棘身上無有完肌膚  
高帝子孫盡隆準龍種自與常人殊豺狼在邑龍在野  
王孫善保千金軀不敢長語臨交衢且為王孫立斯須  
昨夜東風吹血腥東來索駝滿舊都朔方健兒好身手  
昔何勇銳今何愚竊聞天子已傳位聖德北服南單于  
花門勞面請雪恥慎勿出口他人狙哀哉王孫慎勿疎

五陵佳氣無時無

蘇端薛復筵簡薛華醉歌

文章有神交有道端復得之名譽早愛客滿堂盡豪翰  
開筵上日思芳草安得健步移遠梅亂插繁花向晴昊  
千里猶殘舊冰雪百壺且試開懷抱垂老惡聞戰鼓悲  
急觴為緩憂心擣少年努力縱談笑看我形容已枯槁  
坐中薛華善醉歌歌辭自作風格老近來海內為長句  
汝與山東李白好何劉沈謝力未工才兼鮑昭愁絕倒  
諸生頗盡新知樂萬事終傷不自保氣酣日落西風來  
願吹野水添金盃如澗之酒常快意亦如窮愁安在哉  
忽憶雨時秋井塌古人白骨生青苔如何不飲令心哀

偏仄行贈畢曜

偏仄何偏仄我居巷南子巷北可恨鄰里間十日不見顏色自從官馬送還官行路難行澁如棘我貧無乘非無足昔者相過今不得實不是愛微軀又非關足無力徒步翻愁官長怒此心炯炯君應識曉來急雨春風顛睡美不聞鐘鼓傳東家蹇驢許借我泥滑不敢騎朝天已令請急會通籍男兒性命絕可憐焉能終日心拳拳憶君誦詩神凜然辛夷始花亦已落况我與子非壯年街頭酒價常苦貴方外酒徒稀醉眠速宜相就飲一斗恰有三百青銅錢

洗兵馬

中興諸將收山東捷書夜報清晝同河廣傳聞一葦過寇危命在破竹中祇殘鄴城不日得獨任朔方無限功京師皆騎汗血馬回紇餵肉葡萄宮已喜皇威清海岱常思仙仗過崆峒三年笛裏關山月萬國兵前草木風成王功大心轉小郭相謀深古來少司徒清鑒懸明鏡尚書氣與秋天杳二三豪俊為時出整頓乾坤濟時了東走無復憶鱸魚南飛覺有安巢鳥青春復隨冠冕入紫禁正耐煙花繞鶴禁通霄鳳輦備雞鳴問寢龍樓曉攀龍附鳳勢莫當天下盡化為侯王汝等豈知蒙帝力時來不得誇身強關中既留蕭丞相幕下復用張子房張公一生江海客身長九尺鬚眉蒼微起適遇風雲會

扶顛始知籌策良青袍白馬更何有後漢今周喜再昌  
寸地尺天皆入貢奇祥異瑞爭來送不知何國致白環  
復道諸山得銀甕隱士休歌紫芝曲詞人解撰河清頌  
田家望望惜雨乾布穀處處催春種淇上健兒歸莫嬾  
城南思婦愁多夢安得壯士挽天河淨洗甲兵長不用

按箋曰洗兵馬刺肅宗也此言殊不然蓋此詩係恢復而作  
此時肅宗未見失子道安得探其後事而預為譏刺之語乎

### 病後遇王倚飲贈歌

麟角鳳觜世莫識煎膠續弦奇自見尚看王生抱此懷  
在於甫也何由羨且遇王生慰疇昔素知賤子甘貧賤  
酷見凍餒不足恥多病沈年苦無健王生怪我顏色惡  
荅云伏枕艱難徧瘡癘三秋孰可忍寒熱百日相交戰

頭白眼暗坐有臍肉黃皮皺命如綫惟生哀我未平復  
為我力致美肴饍遣人向市賒香粳喚婦出房親自饌  
長安冬菹酸且綠金城土酥靜如練兼求畜豕且割鮮  
密沽斗酒諧終宴故人情義晚誰似令我手脚輕欲旋  
老馬為駒信不虛當時得意况溪春但使殘年飽喫飯  
只願無事常相見

湖城東遇孟雲卿復歸劉顥宅宿宴飲散因為醉

### 歌

疾風吹塵暗河縣行子隔手不相見湖城城南一開眼  
駐馬偶識雲卿面向非劉顥為地主嬾迴鞭轡成高宴  
劉侯歎我攜客來置酒張燈促華饌且將欸曲終今夕

休語艱難尚酣戰照室紅爐促曙光紫窗素月垂文練  
天開地裂長安陌寒盡春生洛陽殿豈知驅車復同軌  
可惜刻漏隨更箭人生會合不可常庭樹雞鳴淚如綫  
閩鄉姜七少府設鱸戲贈長歌  
姜侯設鱸當嚴冬昨日今日皆天風河凍未漁不易得  
鑿冰恐侵河伯宮饕人受魚鮫人手洗魚磨刀魚眼紅  
無聲細下飛碎雪有骨已剝觜春葱偏勸腹腴愧年少  
軟炊香飯綠老翁落碓何曾白紙濕放筋未覺金盤空  
新歡便飽姜侯德清觴異味情屢極東歸貪路自覺難  
欲別上馬身無力可憐為人心事於我見子真顏色  
不恨我衰子貴時悵望且為今相憶

瘦馬行

東郊瘦馬使我傷骨骼硃兀如堵牆絆之欲動轉欹側  
此豈有意仍騰驤細看六印帶官字衆道三軍遺路旁  
皮乾剝落雜泥滓毛暗蕭條連雪霜去歲奔波逐餘寇  
驂騾不慣不得將士卒多騎內廐馬惆悵恐是病乘黃  
當時歷塊誤一蹶委棄非汝能周防見人慘澹若哀訴  
失主錯莫無晶光天寒遠放雁為伴日暮不收烏啄瘡  
誰家且養願終惠更試明年春草長

乾元中寓居同谷縣作歌七首

有客有客字子美白頭亂髮垂過耳歲拾橡栗隨狙公  
天寒日暮山谷裏中原無書歸不得手脚凍皴皮肉死

鳴呼一歌兮歌已哀悲風為我從天來

長鏡長鏡白木柄我生託子以為命黃精無苗山雪盛  
短衣數挽不掩脛此時與子空歸來男呻女吟四壁靜  
鳴呼二歌兮歌始放鄰里為我色惆悵

有弟有弟在遠方三人各瘦何人強生別展轉不相見  
沙塵暗天道路長東飛鴛鴦後鶯鷓安得送我置汝旁  
鳴呼三歌兮歌三發汝歸何處收兄骨

有妹有妹在鍾離良人早歿諸孤癡長淮浪高蛟龍怒  
十年不見來何時扁舟欲往箭滿眼杳杳南國多旌旗  
鳴呼四歌兮歌四奏林猿為我啼清晝

四山多風溪水急寒雨颯颯枯樹濕黃蒿古城雲不開

白狐跳梁黃狐立我生何為在窮谷中夜起坐萬感集

鳴呼五歌兮歌正長魂招不來歸故鄉

南有龍兮在山湫古木龍從枝相樛木葉黃落龍正蟄  
蝮蛇東來水上遊我行怪此安敢出拔劍欲斬且復休  
鳴呼六歌兮歌思遲溪壑為我迴春姿

男兒生不成名身已老三年饑走荒山道長安卿相多  
少年富貴應須致身早山中儒生舊相識但話宿昔傷  
懷抱鳴呼七歌兮悄終曲仰視皇天白日速

石筍行

君不見益州城西門陌上石筍雙高蹲古來相傳是海  
眼苔蘚蝕盡波濤痕雨多往往得瑟瑟此事恍惚難明



論恐是昔時卿相墓立石為表今仍存惜哉俗態好蒙  
蔽亦如小臣媚至尊政化錯迕失大體坐看傾危受厚  
恩嗟爾石笋擅虛名後來未識猶駿奔安得壯士擲天  
外使人不疑見本根

石犀行

君不見秦時蜀太守刻石立作三犀牛自古雖有厭勝  
法天生江水向東流蜀人矜誇一千載泛溢不近張儀  
樓今年灌口損戶口此事或恐為神羞終藉隄防出眾  
力高擁木石當清秋先王作法皆正道詭怪何得參人  
謀嗟爾三犀不經濟缺訛只與長川逝但見元氣常調  
和自免洪濤恣凋瘵安得壯士提天綱再平水土犀奔

茫

杜鵑行

君不見昔日蜀天子化作杜鵑似老鳥寄巢生子不自  
啄羣鳥至今與哺雛雖同君臣有舊禮骨肉滿眼身羈  
孤業工竄伏溪樹裏四月五月偏號呼其聲哀痛口流  
血所訴何事常區區爾豈摧殘始發憤羞帶羽翮傷形  
愚蒼天變化誰料得萬事反覆何所無萬事反覆何所  
無豈憶當殿羣臣趨

題壁畫馬歌

韋侯別我有所適知我憐君畫無敵戲拈秃筆掃驊騮  
歛見騏驎出東壁一匹齧草一匹嘶坐看千里當霜蹄

時危安得真致此與人同生亦同死

戲題畫山水圖歌

十日畫一水五日畫一石能事不受相促迫王宰始有留真跡壯哉崑崙方壺圖挂君高堂之素壁巴陵洞庭日本東赤岸水與銀河通中有雲氣隨飛龍舟人漁子入浦淑山木盡亞洪濤風尤工遠勢古莫比咫尺應須論萬里焉得并州快剪刀剪取吳松半江水

題李尊師松樹障子歌

老夫清晨梳白頭元都道士來相訪握髮呼兒延入戶手提新畫青松障障子松林靜杳冥憑軒忽若無丹青陰崖却承霜雪幹偃蓋反走虬龍形老夫平生好奇古

對此興與精靈聚已知仙客意相親更覺良工心獨苦松下丈人巾屨同偶坐似是商山翁悵望聊歌紫芝曲時危慘澹來悲風

戲為雙松圖歌

天下幾人畫古松畢宏已老韋偃少絕筆長風起纖末滿堂動色嗟神妙兩株慘裂苔蘚皮屈鐵交錯迴高枝白摧朽骨龍虎死黑入太陰雷雨垂松根胡僧憇寂寞龐眉皓首無住著偏袒右肩露雙腳葉裏松子僧前落韋侯韋侯數相見我有一疋好東絹重之不減錦繡段已令拂拭光凌亂請公放筆為直幹

投簡成華兩縣諸子

杜甫

赤縣官曹擁材傑軟裘快馬當冰雪長安苦寒誰獨悲  
杜陵野老骨欲折南山豆苗早荒穢青門瓜地新凍裂  
鄉里兒童項領成朝廷故舊禮數絕自然棄擲與時異  
况乃疎頑臨事拙饑卧動即向一旬弊裘何啻聯百結  
君不見空牆日色晚此老無聲淚垂血

百憂集行

憶年十五心尚孩健如黃犢走復來庭前八月梨棗熟  
一日上樹能千迴即今倏忽已五十坐卧只多少行立  
強將笑語供主人悲見生涯百憂集入門依舊四壁空  
老妻覩我顏色同癡兒未知父子禮叫怒索飯啼門東

漫叟詩話庖厨之門  
在東故曰啼門東

戲作花卿歌

成都猛將有花卿學語小兒知姓名用如快鶻風火生  
見賊唯多身始輕綿州副使著柘黃我卿掃除即日平  
子章髑髏血模糊手提擲還崔大夫李侯重有此節度  
人道我卿絕世無既稱絕世無天子何不喚取守京都

入奏行

竇侍御驥之子鳳之雛年未三十忠義俱骨鯁絕代無  
炯如一段清冰出萬壑置在迎風寒露之玉壺蔗漿歸  
厨金盃凍洗滌煩熱足以寧君軀政用疎通合典則戚  
聯豪貴耽文儒兵革未息人未蘇天子亦念西南隅吐  
蕃憑陵氣頗麤竇氏檢察應時須運糧繩橋壯士喜斬

木火井窮猿呼八州刺史思一戰三城守邊却可圖此  
行入奏計未小密奉聖旨恩宜殊繡衣春當霄漢立綵  
服日向庭幃趨省郎京尹必俯拾江花未落還成都江  
花未落還成都官訪浣花老翁無為君酤酒滿眼酤與  
奴白飯馬青芻

柟樹為風雨所拔歎

倚江柟樹草堂前故老相傳二百年誅茅卜居總為此  
五月髣髴聞寒蟬東南飄風動地至江翻石走流雲氣  
幹排雷雨猶力爭根斷泉源豈天意滄波老樹性所愛  
浦上童童一青蓋野客頻留懼雪霜行人不過聽竿籟  
虎倒龍顛委榛棘淚痕血點垂胸臆我有新詩何處吟

草堂自此無顏色

茅屋為秋風所破歌

八月秋高風怒號卷我屋上三重茅飛度江灑江郊  
高者掛罨長林梢下者飄轉沈塘坳南村羣童欺我老  
無力忍能對面為盜賊公然抱茅入竹去脣焦口燥呼  
不得歸來倚杖自嘆息俄頃風定雲墨色秋天漠漠向  
昏黑布衾多年冷似鐵驕兒惡卧踏裏裂床床屋漏無  
乾處雨脚如麻未斷絕自經喪亂少睡眠長夜沾濕何  
由徹安得廣廈千萬間大庇天下寒士俱歡顏風雨不  
動安如山嗚呼何時眼前突兀見此屋吾廬獨破受凍  
死亦足

天邊行

天邊老人歸未得日暮東臨大江哭隴右河源不種田  
胡騎羌兵入巴蜀洪濤滔天風拔木前飛禿鶯後鴻鵠  
九度附書向洛陽十年骨肉無消息

大麥行

大麥乾枯小麥黃婦女行泣夫走藏東至集壁西梁洋  
問誰腰鎌胡與羌豈無蜀兵三千人部領辛苦江山長  
安得如鳥有羽翅託身白雲還故鄉

觀打魚歌

綿州江水之東津魴魚鱖魚色勝銀漁人漾舟沈大網  
截江一擁數百鱗衆魚常才盡却棄赤鯉騰出如有神

潛龍無聲老蛟怒迴風颯颯吹沙塵饕子左右揮霜刀  
鱠飛金盤白雪高徐州禿尾不足憶漢陰槎頭遠遁逃  
魴魚肥美知第一旣飽歡娛亦蕭瑟君不見朝來割素  
鬚咫尺波濤永相失

又觀打魚

蒼江漁子清晨集設網提網萬魚急能者操舟疾若風  
撐突波濤挺叉入小魚脫漏不可紀半死半生猶戢戢  
大魚傷損皆垂頭屈強泥沙有時立東津觀魚已再來  
主人罷鱸還傾盃日暮蛟龍改窟穴山根鱸鮓隨雲雷  
干戈兵革鬪未止鳳凰麒麟安在哉吾徒胡爲縱此樂  
暴殄天物聖所哀

越王樓歌

綿州州府何磊落顯慶年中越王作孤城西北起高樓  
碧瓦朱甍照城郭樓下長江百丈清山頭落日半輪明  
君王舊跡今人賞轉見千秋萬古情

相從歌贈嚴二別駕

我行入東川十步一迴首成都亂罷氣蕭颯浣花草堂  
亦何有梓中豪俊大者誰本州從事知名久把臂開樽  
飲我酒酒酣擊劔蛟龍吼烏帽拂塵青螺粟紫衣將炙  
緋衣走銅盤燒蠟光吐日夜如何其初促膝黃昏始扣  
主人門誰謂俄頃膠在漆萬事盡付形骸外百年未見  
歡娛畢神傾意豁真佳士久客多憂今愈疾高視乾坤

又可愁一軀交態同悠悠垂老遇君未恨晚似君須向  
古人求

光祿坂行

山行落日下絕壁西望千山萬山赤樹枝有鳥亂鳴時  
暝色無人獨歸客馬驚不憂深谷墜草動只怕長弓射  
安得更似開元中道路即今多擁隔

御定全唐詩錄卷第二十七

又阿... 一... 交... 同... 於... 於... 每... 其... 豈... 未... 辨... 細... 以... 致... 感... 向...  
 又阿... 一... 交... 同... 於... 於... 每... 其... 豈... 未... 辨... 細... 以... 致... 感... 向...  
 又阿... 一... 交... 同... 於... 於... 每... 其... 豈... 未... 辨... 細... 以... 致... 感... 向...  
 又阿... 一... 交... 同... 於... 於... 每... 其... 豈... 未... 辨... 細... 以... 致... 感... 向...  
 又阿... 一... 交... 同... 於... 於... 每... 其... 豈... 未... 辨... 細... 以... 致... 感... 向...  
 又阿... 一... 交... 同... 於... 於... 每... 其... 豈... 未... 辨... 細... 以... 致... 感... 向...  
 又阿... 一... 交... 同... 於... 於... 每... 其... 豈... 未... 辨... 細... 以... 致... 感... 向...  
 又阿... 一... 交... 同... 於... 於... 每... 其... 豈... 未... 辨... 細... 以... 致... 感... 向...  
 又阿... 一... 交... 同... 於... 於... 每... 其... 豈... 未... 辨... 細... 以... 致... 感... 向...  
 又阿... 一... 交... 同... 於... 於... 每... 其... 豈... 未... 辨... 細... 以... 致... 感... 向...

御定全唐詩錄卷第二十八

禮部侍郎臣徐倬翰林院侍讀學士臣徐元正奉

旨校刊

杜甫 五

古體詩 五

陪王侍御同登東山最高頂宴姚通泉晚攜酒泛

江

姚公美政誰與儔不減昔時陳太丘邑中上客有柱史  
 多暇日陪驄馬游東山高頂羅珍羞下顧城郭銷我憂  
 清江白日落欲盡復攜美人登綵舟笛聲憤怨哀中流  
 妙舞逶迤夜未休燈前往往大魚出聽曲低昂如有求

全唐詩錄卷第二十八 杜甫

三更風起寒浪湧取樂喧呼覺船重滿空星河光破碎  
四座賓客色不動請公臨溪莫相違迴船罷酒上馬歸  
人生歡會豈有極無使霜露霑人衣

春日戲題惱郝使君兄

使君意氣凌青霄憶昨歡娛常見招細馬時鳴金騾裹  
佳人屢出董嬌饒東流江水西飛燕可惜春光不相見  
願攜王趙兩紅顏再騁肌膚如素練通泉百里近梓州  
請公一來開我愁舞處重看花滿面尊前還有錦纏頭

短歌行

贈王郎  
司直

王郎酒酣拔劍斫地歌莫哀我能拔爾抑塞磊落之奇  
才豫樟翻風白日動鯨魚跋浪滄溟開且脫佩劍休排

徊西得諸侯棹錦水欲向何門躡珠履仲宣樓頭春色  
深青眼高歌望吾子眼中之人吾老矣

贈友詩官有王  
司直即其人也

桃竹杖引

贈章  
留後

江心蟠石生桃竹蒼波噴浸尺度足斬根削皮如紫玉  
江妃水仙惜不得梓潼使君開一束滿堂賓客皆嘆息  
憐我老病贈兩莖出入爪甲鏗有聲老夫復欲東南征  
乘濤鼓枻白帝城路幽必為鬼神奪拔劍或與蛟龍爭  
重為告曰杖兮杖兮爾之生也甚正直慎勿見水踴躍  
學變化為龍使我不得爾之扶持滅跡於君山湖上之  
青峯噫風塵瀕洞兮豺虎咬人忽失雙杖兮吾將曷從

蜀都賦靈壽桃枝注曰桃枝  
竹屬也出犍江縣可以為杖



韋諷錄事宅觀曹將軍畫馬圖

國初已來畫鞍馬神妙獨數江都王將軍得名三十載  
人間又見真乘黃曾貌先帝照夜白龍池十日飛霹靂  
內府殷紅馬腦盃婕妤傳詔才人索盃賜將軍拜舞歸  
輕紈細綺相追飛貴戚權門得筆跡始覺屏障生光輝  
昔日太宗拳毛騮近時郭家師子花今之新圖有二馬  
復令識者久歎嗟此皆騎戰一敵萬縞素漠漠開風沙  
其餘七匹亦殊絕迴若寒空動煙雪霜蹄蹴踏長楸間  
馬官廝養森成列可憐九馬爭神駿顧視清高氣深穩  
借問苦心愛者誰後有韋諷前支道憶昔巡幸新豐宮  
翠華拂天來向東騰驤磊落三萬匹皆與此圖筋骨同

自從獻寶朝河宗無復射蛟江水中君不見金粟堆前  
松栢裏龍媒去盡烏呼風

丹青引

贈曹將軍霸

將軍魏武之子孫於今為庶為清門英雄割據雖已矣  
文彩風流今尚存學書初學衛夫人但恨無過王右軍  
丹青不知老將至富貴於我如浮雲開元之中常引見  
承恩數上南薰殿凌煙功臣少顏色將軍下筆開生面  
良相頭上進賢冠猛將腰間大羽箭褒公鄂公毛髮動  
英姿颯爽來酣戰先帝天馬玉花驄畫工如山貌不同  
是日牽來赤墀下迴立閭闔生長風詔謂將軍拂絹素  
意匠慘淡經營中斯須九重真龍出一洗萬古凡馬空

玉花却在御榻上榻上庭前屹相向至尊含笑催賜金  
圍人太僕皆惆悵弟子韓幹早入室亦能畫馬窮殊相  
幹惟畫肉不畫骨忍使驕驄氣凋喪將軍畫善蓋有神  
必逢佳士亦寫真即今飄泊干戈際屢貌尋常行路人  
途窮反遭俗眼白世上未有如公貧但看古來盛名下  
終日坎壈纏其身

憶昔

憶昔開元全盛日小邑猶藏萬家室稻米流脂粟米白  
公私倉廩俱豐實九州道路無豺虎遠行不勞吉日出  
齊紈魯縞車班班男耕女桑不相失宮中聖人奏雲門  
天下朋友皆膠漆百餘年間未災變叔孫禮樂蕭何律

豈聞一綃直萬錢有田種穀今流血洛陽宮殿燒焚盡  
宗廟新除狐兔穴傷心不忍問耆舊復恐初從亂離說  
小臣魯鈍無所能朝廷記識蒙祿秩周宣中興望我皇  
灑血江漢身衰疾

冬狩行

時梓州刺史章彝兼  
侍御史留後東川

君不見東川節度兵馬雄校獵亦似觀成功夜發猛士  
三千人清晨合圍步驟同禽獸已斃十七八殺聲落日  
迴蒼穹幕前生致九青兕駝巖崕垂元熊東西南北  
百里間髣髴蹴踏寒山空有鳥名鸚鵡力不能高飛逐  
走蓬肉味不足登鼎俎何為見羈虞羅中春蒐冬狩候  
得同使君五馬一馬驄况今攝行大將權號令頗有前

賢風飄然時危一老翁十年厭見旌旗紅喜君士卒甚  
整肅為我迴轡擒西戎草中狐兔盡何益天子不在咸  
陽宮朝廷雖無幽王禍得不哀痛塵再蒙嗚呼得不哀  
痛塵再蒙

閬山歌

閬州城東靈山白閬州城北玉臺碧松浮欲盡不盡雲  
江動將崩未崩石那知根無鬼神會已覺氣與嵩華敵  
中原格鬪且未歸應結茅齋看青壁

閬水歌

嘉陵江色何所似石黛碧玉相因依正憐日破浪花出  
更復春從沙際歸巴童蕩槳歌側過水雞銜魚來去飛

閬中勝事可腸斷閬州城南天下稀

莫相疑行

男兒生無所成頭皓白牙齒欲落真可惜憶獻三賦蓬  
萊宮自怪一日聲輝赫集賢學士如堵牆觀我落筆中  
書堂往時文彩動人主此日饑寒趨路旁晚將末契託  
年少當面輸心背面笑寄謝悠悠世上兒不爭好惡莫  
相疑

蠶穀行

天下郡國向萬城無有一城無甲兵焉得鑄甲作農器  
一寸荒田牛得耕牛盡耕蠶亦成不勞烈士淚滄沱男  
穀女絲行復歌

折檻行

鳴呼房魏不復見秦王學士時難羨青衿胄子困泥塗  
白馬將軍若雷電千載少似朱雲人至今折檻空嶙峋  
婁公不語宋公語尚憶先皇容直臣

古栢行

孔明廟前有老栢柯如青銅根如石霜皮溜雨四十圍  
黛色參天二千尺君臣已與時際會樹木猶為人愛惜  
雲來氣接巫峽長月出寒通雪山白憶昨路遶錦亭東  
先主武侯同閔宮崔嵬枝榦郊原古窈窕丹青戶牖空  
落落盤踞雖得地冥冥孤高多烈風扶持自是神明力  
正直原因造化功大厦如傾要梁棟萬牛迴首丘山重

不露文章世已驚未辭剪伐誰能送苦心豈免容螻蟻  
香葉終經宿鸞鳳志士幽人莫怨嗟古來材大難為用

縛雞行

小奴縛雞向市賣雞被縛急相喧爭家中厭雞食蟲蟻  
不知雞賣還遭烹蟲雞於人何厚薄吾叱奴人解其縛  
雞蟲得失無了時注目寒江倚山閣

負薪行

夔州處女髮半華四五十無夫家更遭喪亂嫁不售  
一生抱恨堪咨嗟土風坐男使女立應當門戶女出入  
十猶八九負薪歸賣薪得錢應供給至老雙鬟只垂頸  
野花山葉銀釵並筋力登危集市門死生射利兼鹽井

面妝首飾雜啼痕地褊衣寒困石根若道巫山女麤醜  
何得此有昭君村

最能行

峽中丈夫絕輕死少在公門多在水富豪有錢駕大舸  
貧窮取給行艤子小兒學問止論語大兒結束隨商旅  
欵帆側施入波濤撇漩捎潰無險阻朝發白帝暮江陵  
頃來目擊信有徵瞿塘漫天虎鬚怒歸州長年行最能  
此鄉之人氣量窄悞競南風疎北客若道土無英俊才  
何得山有屈原宅

可嘆

天上浮雲如白衣斯須改變如蒼狗古往今來共一時

人生萬事無不有近者抉眼去其夫河東女兒身姓柳  
丈夫正色動引經鄴城客子王季友羣書萬卷常暗誦  
孝經一通看在手貧窮老瘦家賣屐好事就之為攜酒  
豫章太守高帝孫引為賓客敬頗久聞道三年未曾語  
小心恐懼閉其口太守得之更不疑人生反覆看亦醜  
明月無瑕豈容易紫氣鬱鬱猶衝斗時危可仗真豪俊  
二人得置君側否太守頃者領山南邦人思之比父母  
王生早曾拜顏色高山之外皆培塿用為羲和天為成  
用平水土地為厚王也論道阻江湖李也丞疑曠前後  
死為星辰終不滅致君堯舜焉宵朽吾輩碌碌飽飯行  
風后力牧長迴首

觀公孫大娘弟子舞劍器行 并序

大曆二年十月十九日夔府別駕元持宅見臨  
穎李十二娘舞劍器壯其蔚跂問其所師曰余  
公孫大娘弟子也開元三載余尚童穉記於郾  
城觀公孫氏舞劍器渾脫瀏離頓挫獨出冠時  
自高頭宜春梨園二伎坊內人洎外供奉曉是  
舞者聖文神武皇帝初公孫一人而已玉貌錦  
衣况余白首今茲弟子亦匪盛顏旣辨其由來  
知波瀾莫二撫事慷慨聊為劍器行往者吳人  
張旭善草書書帖數常於鄴縣見公孫大娘舞  
西河劍器自此草書長進豪蕩感激即公孫可

知矣

昔有佳人公孫氏一舞劍器動四方觀者如山色沮喪  
天地為之久低昂燿如羿射九日落矯如羣帝驂龍翔  
來如雷霆收震怒罷如江海凝清光絳唇珠裏兩寂寞  
晚有弟子傳芬芳臨穎美人在白帝妙舞此曲神揚揚  
與余問荅既有以感時撫事增惋傷先帝侍女八千人  
公孫劍器初第一五十年間似反掌風塵傾動昏王室  
梨園子弟散如煙女樂餘姿映寒日金粟堆南木已拱  
瞿唐石城草蕭瑟玳筵急管曲復終樂極哀來月東出  
老夫不知其所往足繭荒山轉愁疾

李潮八分小篆歌

杜甫

蒼頡鳥跡既茫昧字體變化如浮雲陳倉石鼓又已訛  
大小二篆生八分素有李斯漢蔡邕中間作者寂不聞  
嶧山之碑野火焚棗木傳刻肥失真苦縣光和尚骨立  
書貴瘦硬方通神惜哉李蔡不復得吾甥李潮下筆親  
尚書韓擇木騎曹蔡有鄰開元已來數八分潮也奄有  
二子成三人况潮小篆逼秦相快劍長戟森相向八分  
一字直百金蛟龍盤拏肉屈強吳郡張顛誇草書草書  
非古空雄壯豈如吾甥不流宕丞相中郎丈人行巴東  
逢李潮逾月求我歌我今衰老才力薄潮乎潮乎奈汝  
何

荆南兵馬使太常卿趙公大食刀歌

太常樓船聲嗷嘈問兵刮寇趨下牢牧出令奔飛百艘  
猛蛟突獸紛騰逃白帝寒城駐錦袍元冬示我胡國刀  
壯士短衣頭虎毛憑軒拔鞘天為高翻風轉日木怒號  
冰翼雪淡傷哀猱鑄錯碧罌鷓鴣膏銚鏑已瑩虛秋濤  
鬼物撇捩辭坑壕蒼水使者捫赤條龍伯國人罷釣鼇  
芮公迴首顏色勞分閩救世用賢豪趙公玉立高歌起  
攬環結佩相終始萬歲持之護天子得君亂絲與君理  
蜀江如線如針水荆岑彈丸心未已賊臣惡子休干紀  
魑魅魍魎徒為耳妖腰亂領敢欣喜用之不高亦不庠  
不似長劍須天倚吁嗟光祿英雄弭大食寶刀聊可比  
丹青宛轉麒麟裏光芒六合無泥滓

王兵馬使二角鷹

悲臺蕭颯石龍從哀壑杈柯浩呼洶中有萬里之長江  
迴風滔日孤光動角鷹翻倒壯士臂將軍玉帳軒翠氣  
二鷹猛腦徐侯睇目如愁胡視天地杉雞竹兔不自惜  
溪虎野羊俱辟易韝上鋒稜十二翻將軍勇銳與之敵  
將軍樹勳起安西崑崙虞泉入馬蹄白羽曾肉三狡猊  
敢決豈不與之齊荆南芮公得將軍亦如角鷹下翔雲  
惡鳥飛飛啄金屋安得爾輩開其羣驅出六合梟鸞分

狄明府

梁公會孫我姨弟不見十年官濟濟大賢之後竟陵遲  
浩蕩古今同一體比看叔伯四十人有才無命百寮底

今者兄弟一百人幾人卓絕秉周禮在汝更用文章為  
長兄白眉復天啓汝門請從曾翁說太后當朝多巧詆  
狄公執政在末年濁河終不污清濟國嗣初將付諸武  
公獨廷諍守丹陛禁中決冊請房陵前朝長老皆流涕  
太宗社稷一朝正漢官威儀重昭洗時危始識不世才  
誰謂荼苦甘如薺汝曹又宜列土食身使門戶多旌祭  
胡為漂泊岷漢間干謁王侯頗歷抵况乃山高水有波  
秋風蕭蕭露泥泥虎之饑下巉嵒蛟之橫出清泚早歸  
來黃土泥衣眼易眯

秋風

秋風淅淅吹我衣東流之外西日微天清小城擣練急



石古細路行人稀不知明月為誰好早晚孤帆他夜歸  
會將白髮倚庭樹故園池臺今是非

久雨期王將軍不至

天雨蕭蕭滯茅屋空山無以慰幽獨銳頭將軍來何遲  
令我心中苦不足數看黃霧亂元雲時聽巖風折喬木  
泉源泠泠雜猿狖泥濘漠漠饑鴻鵠歲暮窮陰耿未已  
人生會面難再得憶爾腰下鐵絲箭射殺林中雪色鹿  
前者坐皮因問毛知子歷險人馬勞異獸如飛星宿落  
應弦不礙蒼山高安得突騎只五千峩然眉骨皆爾曹  
走平亂世相催促一豁明主正鬱陶憶昔范增碎玉斗  
未使吳兵着白袍昏昏閭闔閉氛祲十月荆南雷怒號

別李秘書始興寺所居

不見秘書心若失及見秘書失心疾安為動主理信然  
我獨覺子神充實重聞西方止觀經老身古寺風泠泠  
妻兒待米且歸去他日杖藜來細聽

錦樹行

今日苦短昨日休歲云暮矣增離憂霜凋碧樹作錦樹  
萬壑東逝無停留荒戍之城石色古東郭老人住青丘  
飛書白帝營斗粟琴瑟几杖柴門幽青草萋萋盡枯死  
天馬跂足隨羸牛自古聖賢多薄命姦雄惡少皆封侯  
故國三年一消息終南渭水寒悠悠五陵豪貴反顛倒  
鄉里小兒狐白裘生男隨地要膂力一生富貴傾邦國

莫愁父母少黃金天下風塵兒亦得

赤霄行

孔雀未知牛有角渴飲寒泉逢觝觸赤霄元圃須往來  
翠尾金花不辭辱江中淘河赫飛燕銜泥却落羞華屋  
皇孫猶曾蓮勺困衛莊見貶傷其足老翁慎莫怪少年  
葛亮貴和書有篇丈夫垂名動萬年記憶細故非高賢

復陰

方冬合沓元陰塞昨日晚晴今日黑萬里飛蓬映天過  
孤城樹羽揚風直江濤簸岸黃沙走雲雪埋山蒼兕吼  
君不見夔子之國杜陵翁牙齒半落左耳聾

夜歸

夜半歸來衝虎過山黑家中已眠卧傷見北斗向江低  
仰看明星當空大庭前把燭噴一作噴兩炬峽口驚猿聞一  
箇白頭老罷舞復歌杖藜不睡誰能那顧况集閩俗呼子為團  
父為郎罷此云老罷亦

戲用閩  
俗語也

醉為馬墜諸公攜酒相看

甫也諸侯老賓客罷酒酣歌拓金戟騎馬忽憶少年時  
散蹄迸落瞿塘石白帝城門水雲外低身直下八千尺  
粉堞電轉紫遊韁東得平岡出天壁江村野堂爭入眼  
垂鞭鞞凌紫陌向來皓首驚萬人自倚紅顏能騎射  
安知決臆追風足朱汗驂驪猶噴玉不虞一蹶終損傷  
人生快意多所辱職當憂戚伏衾枕况乃遲暮加煩促

杜甫

朋知來問腆我顏杖藜強起依僮僕語盡還成開口笑  
提攜別掃清谿曲酒肉如山又一時初筵哀絲動豪竹  
共指西日不相貸喧呼且覆盃中淥何必走馬來為問  
君不見嵇康養生遭殺戮

君不見簡蘇侯

君不見道邊廢棄池君不見前者摧折桐百年死樹中  
琴瑟一斛舊水藏蛟龍丈夫蓋棺事始定君今幸未成  
老翁何恨憔悴在山中深山窮谷不可處霹靂颺颺兼  
狂風

憶昔行

憶昔北尋小有洞洪河怒濤過輕舸辛勤不見華蓋君

良岑青輝慘么麼千崖無人萬壑靜三步回頭五步坐  
秋山眼冷魂未歸仙賞心違淚交隋弟子誰依白茅室  
盧老獨啓青銅鎖巾拂香餘搗藥塵階除灰死燒丹火  
元圃滄洲莽空闊金節羽衣飄婀娜落日初霞閃餘映  
倏忽東西無不可松風礮水聲合時青兕黃熊啼向我  
徒然咨嗟撫遺迹至今夢想仍猶左秘訣隱文須內教  
晚歲何功使願果更討衡陽董鍊師南浮早鼓瀟湘柂

魏將軍歌

將軍昔着從事衫鐵馬馳突重兩銜被堅執銳略西極  
崑崙月窟東嶄巖君門羽林萬猛士惡若哮虎子所監  
五年起家列霜戟一日過海收風帆平生流輩徒蠢蠢

長安少年氣欲盡魏侯骨聳精爽緊華嶽峰尖見秋隼  
星纏寶校金盤陀夜騎天駟超天河攬槍熒惑不敢動  
翠蕤雲旂相蕩摩吾為子起歌都護酒闌插劍肝膽露  
鈎陳蒼蒼風元武萬歲千秋奉明主臨江節士安足數

荆溪吳子良曰崑崙月窟在西南云東者謂將軍略地至西方之極而崑崙月窟反在東也

### 朱鳳行

君不見瀟湘之山衡山高山巔朱鳳聲嗷嗷側身長顧  
求其曹翅垂口噤心甚勞下愍百鳥在羅網黃雀最小  
猶難逃願分竹實及螻蟻盡使鴟梟相怒號

### 醉歌行贈公安顏少府請顧八題壁

神仙中人不易得顏氏之子才孤標天馬長鳴待駕馭

秋鷹整翮當雲霄君不見東吳顧文學君不見西漢杜  
陵老詩家筆勢君不嫌詞翰升堂為君掃是日霜風凍  
七澤烏蠻落照銜赤壁酒酣耳熱忘頭白感君意氣無  
所惜一為歌行歌主客

### 夜聞感策

夜聞感策滄江上衰年側耳情所嚮鄰舟一聽多感傷  
塞曲三更歛悲壯積雪飛霜此夜寒孤燈急管復風湍  
君知天地干戈滿不見江湖行路難

### 發劉郎浦

挂帆早發劉郎浦疾風颯颯昏亭午舟中無日不沙塵  
岸上空村盡豺虎十日北風風未迴客行歲晚晚相催

白頭厭伴漁人宿黃帽青鞋歸去來

風雨看舟前落花戲為新句

江上人家桃樹枝春寒細雨出疎籬影遭碧水潛勾引  
風妬紅花却倒吹吹花困癩傷舟楫水光風力俱相怯  
赤憎輕薄遮入懷珍重分明不來接濕久飛遲半欲高  
縈沙惹草細於毛蜜蜂蝴蝶生情性偷眼蜻蜓避百勞

岳麓山道林二寺行

玉泉之南麓山殊道林林壑爭盤紆寺門高開洞庭野  
殿脚插入赤沙湖五月寒風冷佛骨六時天樂朝香爐  
地靈步步雪山草僧寶人人滄海珠塔劫宮牆壯麗敵  
香厨松道清涼俱蓮花交響共命鳥金榜雙迴三足鳥

方丈涉海費時節元圃尋河知有無暮年且喜經行近  
春日兼蒙暄暖扶飄然斑白身奚適傍此烟霞茅可誅  
桃源人家易制度橘洲田土仍膏腴潭府邑中甚淳古  
太守庭內不喧呼昔遭衰世皆晦迹今幸樂國養微軀  
依止老宿亦未晚富貴功名焉足圖久爲野客尋幽慣  
細學周顛免興孤一重一掩吾肺腑山鳥山花吾友于  
宋公放逐曾題壁物色分留與老夫

暮秋枉裴道州手札率爾遣興寄近呈蘇渙侍御  
久客多枉友朋書素書一月凡一束虛名但蒙寒溫問  
泛愛不救溝壑辱齒落未是無心人舌存耻作窮途哭  
道州手札適復至紙長要自三過讀盈把那須滄海珠

入懷本倚崑山玉撥棄潭州百斛酒蕪沒瀟岸千株菊  
使我晝立煩兒孫令我夜坐費燈燭憶子初尉永嘉去  
紅顏白面花映肉軍符侯印取豈遲紫燕綠耳行甚速  
聖朝尚飛戰鬪塵濟世宜引英俊人黎元愁痛會蘇息  
夷狄跋扈徒逡巡投鉞築壇聞意旨頽綱漏網期彌綸  
郭欽上書見大計劉毅答詔驚羣臣他日更僕語不淺  
明公論兵氣益振傾壺簫管黑白髮舞劒霜雪吹青春  
宴筵曾語蘓季子後來傑出雲孫比茅齋定王城郭門  
藥物楚老漁商市市北肩輿每聯袂郭南抱甕亦隱几  
無數將軍西第成早作丞相東山起烏雀苦肥秋粟菽  
蛟龍欲蟄寒沙水天下鼓角何時休陣前部曲終日死

附書與裴因示蘇此生已媿須人扶致君堯舜付公等  
早據要路思捐軀

歲晏行

歲云暮矣多北風瀟湘洞庭白雪中漁父天寒網罟凍  
莫徭射雁鳴桑弓去年米貴闕軍食今年米賤大傷農  
高馬達官厭酒肉此輩杼軸茅茨空楚人重魚不重鳥  
汝休枉殺南飛鴻况聞處處鬻男女割慈忍愛還租庸  
往日用錢捉私鑄今許鉛錫和青銅刻泥為之最易得  
好惡不合長相蒙萬國城頭吹畫角此曲哀怨何時終  
追酬故高蜀州人日見寄 并序

開文書帙中檢所遺忘因得故高常侍適往居

在成都時高任蜀州刺史人日相憶見寄詩淚  
灑行間讀終篇末自枉詩已十餘年莫記存歿  
又六七年矣老病懷舊生意可知今海內忘形  
故人獨漢中王瑀與昭州敬使君超先在愛而  
不見情見乎辭大曆五年正月二十一日却追  
酬高公此作因寄王及敬弟

自蒙蜀州人日作不意清詩久零落今晨散帙眼忽開  
迸淚幽吟事如昨嗚呼壯士多慷慨合沓高名動寥廓  
歎我悽悽求友篇感時鬱鬱匡君略錦里春光空爛熳  
瑤墀侍臣已冥冥瀟湘水國傷黿鼉鄴杜秋天失鵬鷺  
東西南北更誰論白首扁舟病獨存遙拱北辰纏冠盜

欲傾東海洗乾坤邊塞西蕃最充斥衣冠南渡多崩奔  
鼓瑟至今悲帝子曳裾何處覓王門文章曹植波瀾闊  
服食劉安德業尊長笛誰能亂愁思昭州詞翰與招魂

狂歌行贈四兄

與兄行年校一歲賢者是兄愚者弟兄將富貴等浮雲  
弟切功名好權勢長安秋雨十日泥我曹韞馬聽晨雞  
公卿朱門未開鎖我曹已到肩相齊吾兄睡穩方舒膝  
不襪不巾踏曉日男啼女哭莫我知身上須繒腹中實  
今年思我來嘉州嘉州酒重花繞樓樓頭喫酒樓下卧  
長歌短詠還相酬四時八節還拘禮女拜弟妻男拜弟  
幅巾輦帶不挂身頭脂足垢何曾洗吾兄吾兄巢許倫

一生喜怒長任真日斜枕肘寢已熟啾啾唧唧為何人

御定全唐詩錄卷第二十八

Blank space for the poem's text on the right page.

御定全唐詩錄卷第二十九

禮部侍郎臣徐倬翰林院侍讀學士臣徐元正奉

旨校刊

杜甫 六

近體詩

重題鄭氏東亭

華亭入翠微秋日亂清暉崩石欹山樹清漣曳水衣紫  
鱗衝岸躍蒼隼護巢歸向晚尋征路殘雲傍馬飛

天寶初南曹小司寇舅於我太夫人堂下累土為

山一置盈尺以代彼朽木承諸焚香瓷甌甌甚

安矣旁植慈竹蓋茲數峯嶽岑嬋娟宛有塵外



數致乃不知興之所至而作是詩

一價功盈尺三峯意出羣望中疑在野幽處欲生雲  
慈竹春陰覆香爐曉勢分惟南將獻壽佳氣日氛氳

與任城許主簿遊南池

秋水通溝洫城隅進小船晚涼看洗馬森木亂鳴蟬  
菱熟經時雨蒲荒八月天晨朝降白露遙憶舊青氈

登兗州城樓

東郡趨庭日南樓縱目初浮雲連海岱平野入青徐  
孤嶂秦碑在荒城魯殿餘從來多古意臨眺獨躊躇

對雨書懷走邀許十一簿公

東岳雲峰起溶溶滿太虛震雷翻幕燕驟雨落河魚  
座

對賢人酒門聽長者車相邀愧泥濘騎馬到堦除

已上人茅齋

已公茅屋下可以賦新詩枕簟入林僻茶瓜留客遲  
江蓮搖白羽天棘蔓青絲空忝許詢輩難酬支遁詞

房兵曹胡馬詩

胡馬大宛名鋒稜瘦骨成竹批雙耳峻風入四蹄輕  
所向無空濶真堪託死生驍騰有如此萬里可橫行

過宋負外之問舊莊

宋公舊池館零落守陽阿枉道祇從入吟詩許更過  
淹留問耆老寂寞向山河更識將軍樹悲風日暮多

夜宴左氏莊

風林纖月落衣露淨琴張暗水流花徑春星帶草堂檢  
書燒燭短看劍引盃長詩罷聞吳詠扁舟意不忘

春日憶李白

白也詩無敵飄然思不羣清新庾開府俊逸鮑參軍渭  
北春天樹江東日暮雲何時一樽酒重與細論文

送裴二虬作尉永嘉

孤嶼亭何處天涯水氣中故人官就此絕境興誰同隱  
吏逢梅福遊山憶謝公扁舟吾已就把釣待秋風

陪鄭廣文遊何將軍山林

不識南塘路今知第五橋名園依綠水野竹上青霄谷  
口舊相得濠梁同見招平生爲幽興未惜馬蹄遙

百頃風潭上千章夏木清卑枝低結子接葉暗巢鶯鮮  
鯽銀絲鱠香芹碧澗羹翻疑柂樓底晚飯越中行

萬里戎王子何年別月支異花開絕域滋蔓匝清池漢  
使徒空到神農竟不知露翻兼雨打開拆日離披

旁舍連高竹疎籬帶晚花碾渦深沒馬藤蔓曲藏蛇詞  
賦工無益山林跡未賒盡捨書籍賣來問爾東家

剩水滄江破殘山碣石開綠垂風折笋紅綻雨肥梅銀  
甲彈箏用金魚換酒來興移無灑掃隨意坐莓苔

風磴吹陰雪雲門吼瀑泉酒醒思卧簟衣冷欲裝綿野  
老來看客河魚不取錢只疑淳朴處自有一山川

棘樹寒雲色茵陳春藕香脆添生菜美陰益食單涼野

鶴清晨出山精白日藏石林蟠水府百里獨蒼蒼  
憶過楊柳渚走馬定昆池醉把青荷葉狂遺白接羅刺  
船思郢客解水乞吳兒坐對秦山晚江湖興頗隨  
牀上書連屋堦前樹拂雲將軍不好武稚子總能文醒  
酒微風入聽詩靜夜分絺衣挂蘿薜涼月白紛紛  
幽意忽不愜歸期無奈何出門流水住回首白雲多自  
笑燈前舞誰憐醉後歌祇應與朋好風雨亦來過

重過何氏

問訊東橋竹將軍有報書倒衣還命駕高枕乃吾廬花  
妥鶯捎蝶溪喧懶趁魚重來休沐地真作野人居  
山雨樽仍在沙沉榻未移犬迎曾宿客鴉護落巢兒雲

薄翠微寺天清黃子陂向來幽興極步履過東籬  
落日平臺上春風啜茗時石欄斜點筆桐葉坐題詩翡  
翠鳴衣桁蜻蜒立釣絲自今幽興熟來往亦無期  
頗怪朝叅懶應耽野趣長雨拋金鎖甲苔卧綠沉槍手  
自移蒲柳家纔足稻梁看君用幽意白日到羲皇  
到此應常宿相留可判年蹉跎暮容色悵望好林泉何  
日霑微祿歸山買薄田斯遊恐不遂把酒意茫然

冬日有懷李白

寂寞書齋裏終朝獨爾思更尋嘉樹傳不忘角弓詩  
裋褐風霜入還丹日月遲未因乘興去空有鹿門期

杜位宅守歲

守歲阿戎家椒盤已頌花盃簪喧櫪馬列炬散林鴉  
四  
十明朝過飛騰暮景斜誰能更拘束爛醉是生涯

與鄆縣源大少府宴漢陂

應爲西陂好金錢罄一餐飯抄雲子白瓜嚼水精寒無  
計迴船下空愁避酒難主人情爛熳持荅翠琅玕

崔駙馬山亭宴集

蕭史幽棲地林間踏鳳毛狀流何處入亂石閉門高客  
醉揮金椀詩成得繡袍清秋多宴會終日困香醪

九日楊奉先會白水崔明府

今日潘懷縣同時陸浚儀坐開桑落酒來把菊花枝天  
宇清霜淨公堂宿霧披晚酣留客舞鳧舄共差池

送張二十參軍赴蜀州因呈楊五侍御

好去張公子通家別恨添兩行秦樹直萬點蜀山尖御  
史新驄馬參軍舊紫髯皇華吾善處於汝定無嫌

陪諸貴公子丈八溝攜妓納涼晚際遇雨

落日放船好輕風生浪遲竹溪留客處荷淨納涼時公  
子調冰水佳人雪藕絲片雲頭上黑應是雨催詩

雨來霑席上風急打船頭越女紅裙濕燕姬翠黛愁纜  
侵堤柳繫幔卷浪花浮歸路翻蕭颯陂塘五月秋

贈高式顏

昔別是何處相逢皆老夫故人還寂寞削跡共艱虞自  
失論文友空知賣酒壚平生飛動意見爾不能無

故武衛將軍挽歌

嚴警當寒夜前軍落大星壯夫思感決哀詔惜精靈王  
者今無戰書生已勒銘封侯意疎濶編簡爲誰青  
舞劍過人絕鳴弓射獸能銛鋒行愜順猛噬失蹻騰赤  
羽千夫膳黃河十月冰橫行沙漠外神速至今稱  
哀挽青門去新阡絳水遙路人紛雨泣天意颯風颯部  
曲精仍銳匈奴氣不驕無由覩雄略大樹日蕭蕭

官定後戲贈

不作河西尉淒涼爲折骨老夫怕趨走率府且逍遙耽  
酒須微祿狂歌託聖朝故山歸興盡回首向風颯

對雪

戰哭多新鬼愁吟獨老翁亂雲低薄暮急雪舞迴風瓢  
棄樽無綠燼存火似紅數州消息斷愁坐正書空

月夜

今夜鄜州月閨中只獨看遙憐小兒女未解憶長安香  
霧雲鬟濕清輝玉臂寒何時倚虛幌雙照淚痕乾

元日寄韋氏妹

近聞韋氏妹迎在漢鍾離郎伯殊方鎮京華舊國移春  
城迴北斗郢樹發南枝不見朝正使啼痕滿面垂

春望

國破山河在城春草木深感時花濺淚恨別鳥驚心烽  
火連三月家書抵萬金白頭搔更短渾欲不勝簪

憶幼子

驥子春猶隔鶯歌煖正繁別離驚節換聰慧與誰論澗水空山道柴門老樹村憶渠愁只睡炙背俯晴軒

喜達行在所

西憶岐陽信無人遂却迴眼穿當落日心死著寒灰霧樹行相引蓮峰望忽開所親驚老瘦辛苦賊中來愁思胡笳夕淒涼漢苑春生還今日事間道暫時人司隸章初覩南陽氣已新喜心翻倒極嗚咽淚霑巾死去憑誰報歸來始自憐猶瞻太白雪喜遇武功天影靜千官裏心蘇七校前今朝漢社稷新數中興年

月

天上秋期近人間月影清入河蟾不沒擣藥兔長生只益丹心苦能添白髮明干戈知滿地休照國西營

留別賈嚴二閣老兩院補闕

田園須暫往戎馬惜離群去遠留詩別愁多任酒醺一秋常苦雨今日始無雲山路時吹角那堪處處聞

晚行口號

三川不可到歸路晚山稠落雁浮寒水飢鳥集戍樓市朝今日異喪亂幾時休遠媿梁江總還家尚黑頭

獨酌成詩

燈花何太喜酒綠正相親醉裏從爲客詩成覺有神兵戈猶在眼儒術豈謀身苦被微官縛低頭媿野人

收京

仙仗離丹極妖星照玉除須爲下殿走不可好樓居暫  
屈汾陽駕聊飛燕將書依然七廟略更與萬方初  
生意甘衰白天涯正寂寥忽聞哀痛詔又下聖明朝羽  
翼懷商老文思憶帝堯叨逢罪已日霑灑望青霄  
汗馬收宮闕春城鏹賊壕賞應歌杖杜歸及薦櫻桃雜  
鹵橫戈數功臣甲第高萬方頻送喜無乃聖躬勞

春宿左省

花隱掖垣暮啾啾棲鳥過星臨萬戶動月傍九霄多不  
寢聽金鑰因風想玉珂明朝有封事數問夜如何

送翰林張司馬南海勒碑

冠冕通南極文章落上台詔從三殿去碑到百蠻開野  
館濃花發春帆細雨來不知滄海上天遣幾時迴

晚出左掖

晝刻傳呼淺春旗簇仗齊退朝花底散歸院柳邊迷樓  
雪融城濕宮雲去殿低避人焚諫草騎馬欲雞棲

送賈閣老出汝州

西掖梧桐樹空留一院陰艱難歸故里去住損春心宮  
殿青門隔雲山紫邏深人生五馬貴莫受二毛侵

端午日賜衣

宮衣亦有名端午被恩榮細葛含風軟香羅疊雪輕自  
天題處濕當暑著來清意內稱長短終身荷聖情

贈畢四

才大今詩伯家貧苦宦卑飢寒奴僕賤顏狀老翁爲同  
調嗟誰惜論文笑自知流傳江鮑體相顧免無兒

奉贈王中允維

中允聲名久如今契濶深共傳收庾信不比得陳琳一  
病緣明主三年獨此心窮愁應有作試誦白頭吟

奉陪鄭駙馬韋曲

韋曲花無賴家家惱殺人綠樽雖盡日白髮好禁春石  
角鈎衣破藤枝刺眼新何時占叢竹頭戴小烏巾  
野寺垂楊裏春畦亂水間美花多映竹好鳥不歸山城  
郭終何事風塵豈駐顏誰能共公子薄暮欲俱還

至德二載甫自京金光門出間道歸鳳翔乾元初

從左拾遺移華州掾與親故別因出此門有悲

往事

此道昔歸順西郊賊正繁至今殘破膽應有未招魂近  
侍歸京邑移官遠至尊無才日衰老駐馬望千門

寄高三十五詹事

安穩高詹事兵戈久索居時來如宦達歲晚莫情疎天  
上多鴻雁池中足鯉魚相看過半百不寄一行書

路逢襄陽楊少府入城戲呈楊負外甫赴華州日許  
寄負外茯苓

寄語楊負外山寒少茯苓歸來稍暄暖當爲斲青冥翻  
動神仙窟封題鳥獸形兼將老藤杖扶汝醉初醒



得弟消息

近有平陰信遙憐舍弟存側身千里道寄食一家村烽  
舉新酣戰啼垂舊血痕不知臨老日招得幾人魂  
汝懦歸無計吾衰往未期浪傳烏鵲喜深負鵲鷄詩生  
理何顏面憂端且歲時兩京三十口雖在命如絲

得舍弟消息

亂後誰歸得他鄉勝故鄉直爲心厄苦久念與存亡汝  
書猶在壁汝妾已辭房舊犬知愁恨垂頭傍我牀

秦州雜詩

滿目悲生事因人作遠遊遲迴度隴怯浩蕩及關愁水  
落魚龍夜山空鳥鼠秋西征問烽火心折此淹留

秦州山北寺勝跡隗囂宮苔蘚山門古丹青野殿空月  
明垂葉露雲逐度溪風清渭無情極愁時獨向東  
州圖領同谷驛道出流沙降虜兼千帳居人有萬家馬  
驕珠汗落胡舞白蹄斜年少臨洮子西來亦自誇  
鼓角綠邊郡川原欲夜時秋聽殷地發風散入雲悲抱  
葉寒蟬靜歸山獨鳥遲萬方聲一槩吾道竟何之  
南使宜天馬由來萬匹強浮雲連陣沒秋草徧山長聞  
說真龍種仍殘老驪驢哀鳴思戰鬪迴立向蒼蒼  
城上胡笳奏山邊漢節歸防河赴滄海奉詔發金微士  
苦形骸黑旌疎鳥獸稀那聞往來戍恨解鄴城圍  
莽莽萬重山孤城山谷間無風雲出塞不夜月臨關屬

金屋詩金卷之三  
國歸何晚樓蘭斬未還煙塵獨長望衰颯正摧顏  
聞道尋源使從天此路迴牽牛去幾許宛馬至今來一  
望幽燕隔何時郡國開東征健兒盡羌笛暮吹哀  
今日明人眼臨池好驛亭叢篁低地碧高柳半天青稠  
疊多幽事喧呼閱使星老夫如有此不異在郊坰  
雲氣接崑崙淅淅塞雨繁羌童看渭水使客向河源煙  
火軍中幕牛羊嶺上村所居秋草淨正閉小蓬門  
蕭蕭古塞冷漠漠秋雲低黃鶻翅垂雨蒼鷹飢啄泥薊  
門誰自北漢將獨征西不意書生耳臨衰厭鼓鞞  
山頭南郭寺水號北流泉老樹空庭得清渠一邑傳秋  
花危石底晚景卧鐘邊俛仰悲身世溪風爲颯然

傳道東柯谷深藏數十家對門藤蓋瓦映竹水穿沙瘦  
地翻宜粟陽坡可種瓜船人近相報但恐失桃花  
萬古仇池穴潛通小有天神魚人不見福地語真傳近  
接西南境長懷十九泉何時一茅屋送老白雲邊  
未暇泛滄海悠悠兵馬間塞門風落木客舍雨連山阮  
籍行多興龐公隱不還東柯遂疎懶休鑷鬚毛斑  
東柯好崖谷不與衆峰羣落日邀雙鳥晴天卷片雲野  
人矜險絕水竹會平分採藥吾將老兒童未遣聞  
邊秋陰易久不復辨晨光簷雨亂淋幔山雲低度牆鷓  
鷯窺淺井蚯蚓上深堂車馬何蕭索門前百草長  
地僻秋將盡山高客未歸塞雲多斷續邊日少光輝警

急烽常報傳聞檄屢飛西戎外甥國何得逆天威  
鳳林戈未息魚海路常難候火雲烽峻懸軍幕井乾風  
連西極動月過北庭寒故老思飛將何時議築壇  
唐堯真自聖野老復何知曬藥能無婦應門幸有兒藏  
書聞禹穴讀記憶仇池爲報駕行舊鷦鷯在一枝

月夜憶舍弟

戍鼓斷人行秋邊一雁聲露從今夜白月是故鄉明有  
弟皆分散無家問死生寄書長不達況乃未休兵

宿贊公房

杖錫何來此秋風已颯然雨荒深院菊霜倒半池蓮放  
逐寧違性虛空不離禪相逢成夜宿隴月向人圓

東樓

萬里流沙道西征過此門但添新戰骨不返舊征魂樓  
角凌風迴城陰帶水昏傳聲看驛使送節向河源

雨晴

天水秋雲薄從西萬里風今朝好晴景久雨不妨農塞  
柳行疎翠山梨結小紅胡笳樓上發一雁入高空

寓目

一縣蒲萄熟秋山苜蓿多關雲常帶雨塞水不成河羌  
女輕烽燧胡兒制駱駝自傷遲暮眼喪亂飽經過

山寺

野寺殘僧少山園細路高麝香眠石竹鸚鵡啄金桃亂

石通人過懸崖置屋牢上方重閣晚百里見秋毫

即事

聞道花門破和親事却非人憐漢公主生得渡河歸秋  
思拋雲髻腰支賸寶衣羣凶猶索戰回首意多違

遣懷

愁眼看霜露寒城菊自花天風隨斷柳客淚隨清笳水  
淨樓陰直山昏塞日斜夜來歸鳥盡啼殺後棲鴉

天河

常時任顯晦秋至輒分明縱被微雲掩終能永夜清含  
星動雙闕伴月落邊城牛女年年渡何曾風浪生

初月

光細弦豈上影斜輪未安微升古塞外已隱暮雲端河  
漢不改色關山空自寒庭前有白露暗滿菊花團

歸燕

不獨避霜雪其如儔侶稀四時無失序八月自知歸春  
色豈相訪衆雛還識機故巢儻未毀會傍主人飛

擣衣

亦知戍不返秋至拭清砧已近苦寒月況經長別心寧  
辭搗熨倦一寄塞垣深用盡閨中力君聽空外音

促織

促織甚微細哀音何動人草根吟不穩牀下夜相親久  
客得無淚放妻難及晨悲絲與急管感激異天真

螢火

幸因腐草出敢近太陽飛未足臨書卷時能點客衣隨風隔幔小帶雨傍林微十月清霜重飄零何處歸

蒹葭

摧折不自守秋風吹若何暫時花戴雪幾處葉沉波體弱春苗早叢長夜露多江湖後搖落亦恐歲蹉跎

苦竹

青冥亦自守軟弱強扶持味苦夏蟲避叢早春鳥疑軒墀曾不重剪伐欲無辭幸近幽人屋霜根結在茲

除架

束薪已零落瓠葉轉蕭疎幸結白花了寧辭青蔓除秋

蟲聲不去暮雀意何如寒事今牢落人生亦有初

廢畦

秋蔬擁霜露豈敢惜凋殘暮景數枝葉天風吹汝寒綠沾泥滓盡香與歲時闌生意春如昨悲君白玉盤

夕烽

夕烽來不近每日報平安塞上傳光小雲邊落點殘照秦通警急過隴自艱難聞道蓬萊殿千門立馬看

送遠

帶甲滿天地胡為君遠行親朋盡一哭鞍馬去孤城草木歲月晚關河霜雪清別離已昨日因見古人情

天末懷李白

涼風起天末君子意如何鴻雁幾時到江湖秋水多文章憎命達魑魅喜人過應共冤魂語投時贈汨羅

空囊

翠栢苦猶食晨霞高可餐世人共鹵莽吾道屬艱難不爨井晨凍無衣牀夜寒囊空恐羞澁留得一錢看

病馬

乘爾亦已久天寒關塞深塵中老盡力歲晚病傷心毛骨豈殊衆馴良猶至今物微意不淺感動一沉吟

蕃劍

致此自僻遠又非珠玉裝如何有奇怪每夜吐光芒虎氣必騰趙龍身寧久藏風塵苦未息持汝奉明王

觀安西兵過赴關中待命

四鎮富精銳摧鋒皆絕倫還聞獻士卒足以靜風塵老馬夜知道蒼鷹饑著人臨危經久戰用急始如神奇兵不在衆萬馬救中原談笑無河北心肝奉至尊孤雲隨殺氣飛鳥避轅門竟日留歡樂城池未覺喧

野望

清秋望不極迢遞起層陰遠水兼天淨孤城隱霧深葉稀風更落山迴日初沉獨鶴歸何晚昏鴉已滿林

示姪佐

多病秋風落君來慰眼前自聞茅屋趣只想竹林眠滿谷山雲起侵籬澗水懸嗣宗諸子姪早覺仲容賢

佐還山後寄

山晚浮雲合歸時恐路迷澗寒人欲到村黑鳥應棲野  
客茅茨小田家樹木低舊諳疎懶叔須汝故相攜  
白露黃粱熟分張素有期已應春得細頗覺寄來遲味  
豈同金菊香宜配綠葵老人他日愛正想滑流匙  
幾道泉澆圃交橫落慢坡葳蕤秋葉少隱映野雲多隔  
沼連香芰通林帶女蘿甚聞霜薤白重惠意如何

秋日阮隱居致薤三十束

隱者柴門內畦蔬繞舍秋盈筐承露薤不待致書求束  
比青芻色圓齊玉筋頭衰年關鬲冷味煖併無憂  
爲農

錦里煙塵外江村八九家圓荷浮小葉細麥落輕花卜  
宅從茲老爲農去國賒遠慚勾漏令不得問丹砂

賓至

患氣輕時久臨江卜宅新喧卑方避俗疎快頗宜人有  
客過茅宇呼兒正葛巾自鋤稀菜甲小摘爲情親

田舍

田舍清江曲柴門古道旁草深迷市井地僻懶衣裳櫟  
柳枝枝弱枇杷樹樹香鸕鷀西日照曬翅滿魚梁

西郊

時出碧雞坊西郊向草堂市橋官柳細江路野梅香傍  
架齊書帙看題減藥囊無人覺來往疎懶意何長

遣興

干戈猶未定弟妹各何之  
拭淚霑襟血梳頭滿面絲  
地卑荒野大天遠暮江遲  
衰疾那能久應無見汝時

出郭

霜露晚淒淒高天逐望低  
遠煙鹽井上斜景雪峯西  
故國猶兵馬他鄉亦鼓鼙  
江城今夜客還與舊鳥啼

過南鄰朱山人水亭

相近竹參差相過人不知  
幽花欹滿樹小水細通池  
歸客村非遠殘樽席更移  
看君多道氣從此數追隨

和裴迪登新津寺寄王侍郎

何限倚山木吟詩秋葉黃  
蟬聲集古寺鳥影度寒塘  
風

物悲遊子登臨憶侍郎  
老夫貪佛日隨意宿僧房

歲暮

歲暮遠爲客邊隅  
還用兵煙塵犯雪嶺  
鼓角動江城  
天地日流血朝廷誰請纓  
濟時敢愛死寂寞壯心驚

奉酬李都督表丈早春作

力疾坐清曉來時悲早春  
轉添愁伴客更覺老隨人  
紅入桃花嫩青歸柳葉新  
望鄉應未已四海尚風塵

遣意

轉枝黃鳥近泛渚白鷗輕  
一徑野花落孤村春水生  
衰年催釀黍細雨更移橙  
漸喜交遊絕幽居不用名

簷影微微落津流脉脉斜  
野船明細火宿雁聚圓沙  
雲



掩初弦月香傳小樹花鄰人有美酒稚子夜能賒

漫成

野日荒荒白春流泯泯清渚蒲隨地有村逕逐門成只  
作披衣慣常從漉酒生眼邊無俗物多病也身輕  
江皋已仲春花下復清晨仰面貪看鳥回頭錯應人讀  
書難字過對酒滿壺頻近識峨眉老知予懶是真

春夜喜雨

好雨知時節當春乃發生隨風潛入夜潤物細無聲野  
徑雲俱黑江船火獨明曉看紅濕處花重錦官城

春水

三月桃花浪江流復舊痕朝來沒沙尾碧色動柴門接

縷垂芳餌連筒灌小園已添無數鳥爭浴故相喧

江亭

坦腹江亭暖長吟野望時水流心不競雲在意俱遲寂  
寂春將晚欣欣物自私故林歸未得排悶強裁詩

村夜

蕭蕭風色暮江頭人不行村春雨外急鄰火夜深明胡  
羯何多難漁樵寄此生中原有兄弟萬里正含情

早起

春來常早起幽事頗相關帖石防隕岸開林出遠山一  
丘藏曲折緩步有躋攀童僕來城市瓶中得酒還

落日

落日在簾鉤溪邊春事幽芳菲綠岸圃樵爨倚灘舟  
啅雀爭枝墜飛蟲滿院遊濁醪誰造汝一酌散千憂

徐步

整履步青蕪荒庭日欲晡片泥隨燕背花蘂上蜂鬚把  
酒從衣濕吟詩信杖扶敢論才見忌實有醉如愚

寒食

寒食江村路風花高下飛汀煙輕冉冉竹日淨暉暉田  
父要皆去鄰家問不違地偏相識盡雞犬亦忘歸

琴臺

茂陵多病後尚愛卓文君酒肆人間世琴臺日暮雲野  
花留寶靨蔓草見羅裙歸鳳求皇意寥寥不復聞

聞斛斯六官未歸

故人南郡去去索作碑錢本賣文爲活翻令室倒懸荆  
扉溪蔓草土銜冷踈煙老罷休無賴歸來省醉眠

遊修覺寺

野寺江天豁山扉花竹幽詩應有神助吾得及春遊徑  
石相縈帶川雲自去留禪枝宿衆鳥漂轉暮歸愁

後遊

寺憶新遊處橋憐再渡時江山如有待花柳更無私野  
潤煙光薄沙暄日色遲客愁全爲減捨此復何之

晚晴

村晚驚風度庭幽過雨霑夕陽薰細草江色映疎簾書

亂誰能帙孟乾可自添時聞有餘論未怪老夫潛

朝雨

涼氣晚蕭蕭江雲亂眼飄風鴛藏近渚雨燕集深條黃  
綺終辭漢巢由不見堯草堂樽酒在幸得過清朝

野望因過常少仙

野橋齊度馬秋望轉悠哉竹覆青城合江從灌口來入  
村樵徑引嘗果栗皺開落盡高天日幽人未遣迴

奉簡高三十五使君

當代論才子如公復幾人驂騮開道路鷹隼出風塵行  
色秋將晚交情老更親天涯喜相見披豁對吾真

酬高使君相贈

古寺僧牢落空房客寓居故人供祿米鄰舍與園蔬雙  
樹容聽法三車肯載書草元吾豈敢賦或似相如

草堂即事

荒村建子月獨樹老夫家霧裏江船度風前逕竹斜寒  
魚依密藻宿鷺起圓沙蜀酒禁愁得無錢何處賒

范二負外邈吳十侍御郁特枉駕闕展待聊寄此  
暫往比鄰去空聞二妙歸幽棲誠簡略衰白已光輝野  
外貧家遠村中好客稀論文或不媿肯重款柴扉

觀李固請司馬弟山水圖

方丈渾連水天台總映雲人間長見畫老去恨空聞范  
蠡舟偏小王喬鶴不羣此生隨萬物何路出塵氛

高浪垂翻屋崩崖欲壓牀野橋分子細沙岸繞微茫紅  
浸珊瑚短青懸薜荔長浮查並坐得仙老暫相將

贈別何邕

生死論交地何由見一人悲君隨燕雀薄宦走風塵綿  
谷元通漢沱江不向秦五陵花滿眼傳語故鄉春

贈別鄭鍊赴襄陽

戎馬交馳際柴門老病身把君詩過日念此別驚神地  
濶峨眉晚天高峴首春爲於耆舊內試覓姓龐人

送段功曹歸廣州

南海春天外功曹幾月程峽雲籠樹小湖日落船明交  
趾丹砂重韶州白葛輕幸君因估客時寄錦官城

畏人

早花隨處發春鳥異方啼萬里清江上三年落日低畏  
人成小築福性合幽棲門逕從榛草無心走馬蹄

遠遊

賤子何人記迷方著處家竹風連野色江沫擁春沙種  
藥扶衰病吟詩解歎嗟似聞胡騎走失喜問京華

水檻遣心

去郭軒楹敞無村眺望賒澄江平少岸幽樹晚多花細  
雨魚兒出微風燕子斜城中十萬戶此地兩三家  
蜀天常夜雨江檻已朝晴葉潤林塘密衣乾枕席清不  
堪祇老病何得尚浮名淺把涓涓酒深憑送此生

屏跡

用拙存吾道幽居近物情桑麻深雨露燕雀半生成村  
鼓時時急漁舟箇箇輕杖藜從白首心跡喜雙清  
晚起家何事無營地轉幽竹光團野色舍影漾江流失  
學從兒懶長貧任婦愁百年渾得醉一月不梳頭

九日登梓州城

伊昔黃花酒如今白髮翁追歡筋力異望遠歲時同弟  
妹悲歌裏朝廷醉眼中兵戈與關塞此日意無窮

九日奉寄嚴大夫

九日應愁思經時冒險艱不眠持漢節何路出巴山小  
驛香醪嫩重巖細菊斑遙知簇鞍馬回首白雲間

寶應元年四月

代宗即位召武入朝是年徐知道反武阻兵九月尚未出巴

懷舊

地下蘇司業情親獨有君那因喪亂後便有死生分老  
罷知明鏡悲來望白雲自從失詞伯不復更論文

所思

得台州鄭司戶度消息

鄭老身仍竄台州信始傳為農山澗曲卧病海雲邊世  
已疎儒素人猶乞酒錢徒勞望牛斗無計斲龍泉

不見

近無李白消息

不見李生久佯狂真可哀世人皆欲殺吾意獨憐才敏  
捷詩千首飄零酒一杯匡山讀書處頭白好歸來

陪李金吾花下飲

杜甫

勝地初相引徐行得自娛見輕吹烏毳隨意數花鬚細  
草稱偏坐香醪懶再沽醉歸應犯夜可怕李金吾

御定全唐詩錄卷第二十九

卷之四  
目錄  
行  
尋  
日  
吳  
見  
經  
欠  
馬  
毛  
直  
意  
致  
化  
讀  
細

